

Pattison

I.

Assatz sai d'amor ben parlar
ad ops dels autres amadors;
mas al mieu pro, que m'es plus car,
non sai ren dire ni comtar;
qu'a mi non val bes ni lauzors
ni mals-digz ni motz avars;
mas ar sui vas Amor aitaus
fis e bos e francs e liaus

II.

Per qu'ensenharai ad amar
los autres bos dompneyadors;
e si'n crezon mon essenhar
far lor a d'amar conquistar
tot aitan cant volran de cors!
E si? oguan pendutz o ars
qui no m'en creira, qar bon laus
n'auran selhs qu'en tenran las claus!

III.

Si voletz dompnas guazanhar,
quan querretz que·us fassan honors,
si·us fan avol respos avar
vos las prenetz a menassar;
e si vos fan respos peiors
datz lor del ponh per mieg sas nars;
e si son bravas siatz braus!
Ab gran mal n'auretz gran repaus.

IV.

Ancar vos vuelh mais ensenhar
ab que conquerretz las melhors.
Ab mals digz et ab lag cantar
que fassatz tut, et ab vanar;
e que honretz las sordeyors.
Per lor anctas las levetz pars,
e que guardetz vostres ostaus
que non semblon gleisas ni naus.

V.

Ab aisso n'auretz pro, so·m par.
Mas ieu·m tenrai d'autras colors

per so quar no·m agrad? amar;
que ja mais no·m vuelh castiar,
que s?eron totas mas serors!
Per so lor serai fis e cars,
humils e simples e leyaus,
dous, amoros, fis e coraus.

VI.

Mas d?aisso·us sapchatz ben gardar,
que so qu?ie·n farai er folhors.
Non fassatz ver que nesci par;
mas so qu?ieu ensenh tenetz car
si non voletz sofrir dolors
ab penas et ab loncs plorars!
Qu?aissi lor for? envers e maus
si mais m?agrades lor otaus.

VII.

Mas per so·m puesc segurs guabar
qu?ieu, et es mi grans deshonor,
non am ren, ni sai qu?es enquar!
Mas Mon Anel am, que·m ten clar,
quar fon el det . . . Ar son, trop sors!
Lengua, non mais! Que trop parlars
fai piegz que pechatz criminaus;
per qu?ieu·m tenrai mon cor enclaus.

VIII.

Mas be·l sabra Mos Belhs Jocglars;
qu?ilh val tant, e m?es tan coraus,
que ja de lieys no·m venra maus.

IX.

E mos vers tenra, qu?era·l paus,
a Rodes, don son natura.

- letto 611 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/pattison-15>